

Dr Wettkampfcchef

I ha ne Uftrag übercho
für ne chlyni Laudatio.
Är wärd sech zwar gäg ds Ehre
vermuetelech de chli wehre
u wöu kener Lorbeere.

Aber nei, Peter
mir makes nid speter
Itz muesses sy
drum schickdi grad dry.

Wettkampfcchef - e Kaderposchte!
Was meinsch, Peter, woschte?
So het es tönt vor paarne Jahr,
dr Peter seit: "I makes, klar."
Im Vorstand isch me grüüsi froh,
dass är dä Job het übernoh.

U när isch dPoscht abgange,
e nöii Ära het aagfange.
Vor Idee het er gsprudlet
het ds Umfäld mängisch chli erhudlet.
Mängs Projekt het er aagrisse
u sech meischtens sälber grad drybisse,
vielech us Angscht mit Delegiere
chönntme de chli zviel riskiere.
Är het drum aues gärn perfekt
u dZiel si höch, wo-n är sich steckt.

Das gilt bim Sport natürlech ou
är het nid nur e schnälli Frou,
isch sälber Turbo ungerwägs
u ghört bi H60 zu de Cracks.

Är isch a vielem intressiert
u isch ou "Kunscht orientiert".

Mit däm Projekt - wyt ume gschetzt -
het är sich es Dänkmal gsetzt.
Dr Ufwand gar nid öppe chly,
viel Arbeit isch drhinger gsy.

Bi so viel Engagema
muess me sicher mängs la stah,
drum tüe mir ds Demissioniere
mit viel Verständnis akzeptiere.

I danke, dass dä wichtig Poschte
mängisch rächt cha Närke choschte.
E so bim Hälfer sueche,
hesch sicher mängisch müesse flueche.
"Sorry, Peter, würd ja scho,
aber dZyt louftmer drvo.
- Sorry, Peter, bi im Seich,
grabe im Garte grad e Teich.
- Sorry, Peter, i wott ga wandere,
frag lieber zersch en andere."
U dä verwirft ganz sicher dHäng,
im Gschäft heig är grad extrem sträng.
Är seit är miechs ja schampar gärn,
aber äbe haut scho lieber färn.
Peter dänkt, tuesch lyre, Mann?
u seit okay, mir blybe dran.
Isch dr Telefonhörer nachhär heiss,
chunnt dr Momänt wo Peter weiss,
Loufleiter wird ig kene finge,
s'heisst, dass i säuber muess yspringe.

Für d Amäldig isch er mi aagange
u drbi ganz gschickt vorgange.
Är het mi grüehmt bis äne uus,
so wie-n ig chömi keni druus.
U i bi sim Charme eifach erläge
ha ömu nie "Nei" chönne säge.

Dr Peter git sys Amt itz ab,
macht aber när bestimmt nid schlapp,
wird ds Klubläbe sicher wyter pflege
u für üs no viel Guets bewege.

Für das, wo du bis hie hesch taa
sösusch üse härzlechtscht Dank hüt ha.
Danke für alls wo du hesch gmacht,
mängisch sicher bis spät id Nacht.
Danke für diner Ideene.
Danke für ds Ufmischle vor Szene.
Danke fürs Organisiere
mit Sitzige, Mails u Telefoniere.
Danke für dys Besträge
für nes gsungs Vereinsläbe.
Wär drfür es offnigs Ohr
danket dir für di Humor.
Wohltuend weme ne versteit
u dlronie drby vertreit.

Was mir abschliessend säge wei:
Peter, mir si froh, dass mir di hei.